

四庫全書

史部

欽定四庫全書

魏書卷二

齊

魏

收

撰

帝紀第二

太祖紀

太祖道武皇帝諱珪昭成皇帝之嫡孫獻明皇帝之子也母曰獻明賀皇后初因遷徙遊于雲澤既而寢息夢日出室內寤而見光自牖屬天歟然有感以建國三十

四年七月七日生太祖於參合陂北其夜復有光明昭
成大悅羣臣稱慶大赦告於祖宗保者以帝體重倍於
常兒竊獨竒恠明年有榆生於埋胞之坎後遂成林弱
而能言目有光曜廣額大耳衆咸異之年六歲昭成崩
苻堅遣將內侮將遷帝於長安既而獲免語在燕鳳傳
堅軍既還國衆離散堅使劉庫仁劉衛辰分攝國事南
部大人長孫嵩及元他等盡將故民南依庫仁帝於是
轉幸獨孤部

元年苑昭成皇帝於金陵營梓宮木梯盡生成林帝雖
沖幼而毅然不羣庫仁常謂其子曰帝有高天下之志
興復洪業光揚祖宗者必此主也

二年冬十月付堅敗于淮南是月慕容文等殺庫仁庫
仁弟眷攝國部

八年慕容暉弟冲僭立姚萇自稱大單于萬年秦王慕容
容垂僭稱燕王

九年庫仁子顯殺眷而代之乃將謀逆商人王霸知之

履帝足於衆中帝乃馳還是時故大人梁蓋盆子六眷
為顯謀主盡知其計密使部人穆崇馳告帝乃陰結舊
臣長孫獫狁元他等秋八月乃幸賀蘭部其日顯果使人
求帝不及語在獻明太后傳是歲鮮卑乞伏國仁私署
大單于苻堅為姚萇所殺子丕僭立

登國元年春正月戊申帝即代王位郊天建元大會於
牛川復以長孫嵩為南部大人以叔孫普洛為北部大
人班爵敘勲各有差二月幸定襄之盛樂息衆課農三

月劉顯自善無南走馬邑其族奴真率所部來降夏四月改稱魏王五月車駕東幸陵石護佛侯部帥侯辰乙弗部帥代題叛走諸將追之帝曰侯辰等世脩職役雖有小愆宜且忍之當今草初人情未一愚近者固應赧赧不足追也秋七月己酉車駕還盛樂代題復以部落來降旬有數日亡奔劉顯帝使其孫倍斤代領部落是月劉顯弟亢湫率騎掠奴真部落既而率以來降初帝叔父窟咄為苻堅徙于長安因隨慕容永永以為新興

太守八月劉顯遣弟九泥迎窟咄以兵隨之來逼南境
於是諸部騷動人心顧望帝左右于植等與諸部人謀
為逆以應之事泄誅造謀者五人餘悉不問帝慮內難
乃北踰陰山幸賀蘭部阻山為固遣行人安同長孫賀
使于慕容垂以徵師垂遣使朝貢并令其子賀麟帥步
騎以隨同等冬十月賀麟軍未至而寇已前逼於是北
部大人叔孫普洛等十三人及諸烏丸亡奔衛辰帝自
好山遷幸牛川屯于延水南出代谷會賀麟於高柳大

破窟咄咄奔衛辰衛辰殺之帝悉收其衆十二月慕容垂遣使朝貢奉帝西單于印綬封上谷王帝不納是歲慕容垂僭稱皇帝於中山自號大燕符丕死符登自立於隴東姚萇稱皇帝於長安自號大秦慕容沖為部下所殺慕容永僭立

二年春正月班賜功臣長孫嵩等七十三人各有差二月帝幸甯川夏五月遣行人安同徵兵於慕容垂垂使子賀麟率衆來會六月帝親征劉顯於馬邑南追至彌

澤大破之顯南奔慕容永盡收其部落秋八月帝至自
伐顯冬十月癸卯幸濡源遣外朝大人王建使於慕容
垂十一月遂幸赤城十有二月巡松漠還幸牛川

三年春二月帝東巡夏四月幸東赤城五月癸亥北征
庫莫奚六月大破之獲其四部雜畜十餘萬渡弱落水
班賞將士各有差秋七月庚申庫莫部帥鳩集遺散夜
犯行宮縱騎撲討盡殺之其月帝還赤城八月使九原
公元儀使於慕容垂冬十月慕容垂遣使朝貢十有二

月辛卯車駕西征至女水討解如部大破之獲男女雜畜十數萬是歲乞伏國仁死弟乾歸立私署河南王

四年春正月甲寅龍襄高車諸部落大破之二月癸巳至女水討叱突鄰部大破之戊戌賀染干兄弟率諸部來救與大軍相遇逆擊走之夏四月行還赤城五月陳留公元虔使於慕容垂冬十月垂遣使朝貢是歲氐呂光自稱三河王遣使朝貢

五年春三月甲申帝西征次廐渾海龍襄高車袁紇部大

破之虜獲生口馬牛羊二十餘萬慕容垂遣子賀麟率衆來會夏四月丙寅行幸意平山與賀麟討賀蘭訖突鄰訖奚諸部落大破之六月還幸牛川衛辰遣子直力鞬寇賀蘭部圍之賀納等請降告困秋七月丙子帝引兵救之至羊山直力鞬退走八月還幸牛川遣秦王觚使於慕容垂九月壬申討叱奴部於囊曲河大破之冬十月遷雲中討高車豆陳部於狼山破之十有二月訖奚部大人庫寒舉部內屬十有二月訖突鄰大人屈地

鞬舉部內屬帝還次白漠

六年春二月幸紐埏川三月遣九原公元儀陳留公元
虔等西討黠弗部大破之夏四月祠天六月慕容賀麟
破賀訥於赤城帝引兵救之麟退走秋七月壬申講武
於牛川行還紐埏川慕容垂止元觚而求名馬帝絕之
乃遣使於慕容永永使其大鴻臚慕容鈞奉表勸進尊
號其月衛辰遣子直力鞬出柁陽塞侵及黑城九月帝
襲五原屠之收其積穀還紐埏川於柁陽塞北樹碑記

功冬十月戊戌北征蠕蠕追之及於大磧南牀山下大破之班賜從臣各有差其東西二部主匹候跋及縕紇提斬別帥屋擊于事具蠕蠕傳十有一月戊辰還幸紐埵川戊寅衛辰遣子直力鞬寇南部已卯車駕出討壬午大破直力鞬軍於鐵岐山南獲其器械輜重牛羊二十餘萬戊子自五原金津南渡河辛卯次其所居悅跋城衛辰父子奔遁壬辰詔諸將追之擒直力鞬十有二月獲衛辰尸斬以徇遂滅之語在衛辰傳衛辰少子屈

乃亡奔薛于部車駕次于鹽池自河以南諸部悉平簿
其珍寶畜產名馬三十餘萬匹牛羊四百餘萬頭班賜
大臣各有差收衛辰子弟宗黨無少長五千餘人盡殺
之山胡酋大幡頽業易于等率三千餘家降附出居于
馬邑是歲起河南宮

七年春正月辛未根山遂次黑鹽池饗宴羣臣觀諸國
貢使北之美水三月甲子宴羣臣於水濱還幸河南宮
西部泣黎大人茂鮮叛走遣南部大人長孫嵩追討大

破之夏五月班賜諸官馬牛羊各有差秋八月行幸漠南仍築巡臺冬十有二月慕容永遣使朝貢是歲皇子嗣生

八年春正月帝南巡二月幸殺羊原赴白樓三月車駕西征侯呂鄰部夏四月至苦水大破之五月還幸白樓慕容垂討慕容永於長子六月車駕北巡永來告急遣陳留公元虔將軍庾岳率騎五萬東度河救之破類拔部帥劉曜等徙其部落元虔等因屯秀容慕容垂遂圍

長子秋七月車駕臨幸新壇庚寅宴羣臣仍講武先是
衛辰子屈丐奔薛于部徵之不送八月帝南征薛于部
帥太悉佛於三城會其先出擊曹覆帝乘虛屠其城獲
太悉佛子珍寶徙其民而還太悉佛聞之來赴不及遂
奔姚興九月還幸河南宮是歲姚萇死

九年春三月帝北巡使東平公元儀屯田於河北五原
至於柰陽塞外夏五月田於河東秋七月還幸河南宮
冬十月蠕蠕社論等率部落西走事具蠕蠕傳是歲姚

莢子興僭立殺苻登慕容垂滅永

十年春正月太悉佛自長安還嶺北上郡以西皆應之
夏五月幸鹽池六月還幸河南宮秋七月慕容垂遣其
子寶來寇五原造舟收穀帝遣右司馬許謙徵兵於姚
興東平公元儀徙據朔方八月帝親治兵於河南九月
進師臨河築臺告津連旌沿河東西千里有餘是時陳
留公元虔五萬騎在東以絕其左元儀五萬騎在河北
以承其後畧陽公元遵七萬騎塞其中山之路冬十月

辛未寶燒船夜過十一月己卯帝進軍濟河乙酉夕至
參合陂丙戌大破之語在寶傳生擒其陳留王紹魯陽
王倭奴桂林王道成濟陰公尹國北地王世子鍾葵安
定王世子羊兒以下文武將吏數千人器甲輜重軍資
雜財十餘萬計於俘虜之中擢其才識者賈彝賈閏晁
崇等與參謀議憲章故實班賞大臣將校各有差十有
二月還幸雲中之盛樂

皇始元年春正月大蒐于定襄之虎山因東幸善無北

陂三月慕容垂來寇桑乾川陳留公元虔先鎮平城時
徵兵未集虔率麾下邀擊失利死之垂遂至平城西北
踰山結營聞帝將至乃築城自守疾甚遂遁走死於上
谷子寶匿喪而還至中山乃僭立夏六月癸酉遣將軍
王建等三軍討寶廣寧太守劉亢沉斬之徙其部落寶
上谷太守慕容普鄰捐郡奔走丁亥皇太后賀氏崩是
月葬獻明太后秋七月右司馬許謙上書勸進尊號帝
始建天子旌旗出入警蹕於是改元八月庚寅治兵于

東郊己亥大舉討慕容寶帝親勒六軍四十餘萬南出
馬邑踰于句注旌旗駱驛二千餘里鼓行而前民屋皆
震別詔將軍封真等三軍從東道出襲幽州圍薊九月
戊午次陽曲乘西山臨觀晉陽命諸將引騎圍脇已而
罷還寶并州牧遼西王農大懼將妻子棄城夜出東遁
并州平初建臺省置百官封公侯將軍刺史太守尚書
郎已下悉用文人帝初拓中原留心慰納諸士大夫詣
軍門者無少長皆引入賜見存問周悉人得自盡苟有

微能咸蒙敎用已未詔輔國將軍奚牧畧地晉川獲慕
容寶丹陽王買得等於平陶城冬十月乙酉車駕出井
陘使冠軍將軍王建左軍將軍李粟五萬騎先驅啓行
十有一月庚子朔帝至真定自常山以東守宰或捐城
奔竄或稽顙軍門唯中山鄴信都三城不下別詔征東
大將軍東平公儀五萬騎南攻鄴冠軍將軍王建左軍
將軍李粟等攻信都軍之所行不得傷民桑棗戊午進
軍中山已未引騎圍之帝謂諸將曰朕量寶不能出戰

必當憑城自守偷延日月急攻則傷士久守則費糧不如先平鄴信都然後還取中山於計為便若移軍遠去寶必散衆求食民間如此則人心離阻攻之易克諸將稱善丁卯車駕幸魯口城是歲司馬昌明死子德宗僭立遣使朝貢呂光僭稱天王號大涼遣使朝貢

二年春正月己亥朔大饗羣臣於魯口慕容寶遣其左衛將軍慕容騰寇博陵殺中山太守及高陽諸縣令長抄掠租運是時信都未下庚申乃進軍壬戌引騎圍之

其夜寶冀州刺史宜都王慕容鳳踰城奔走歸于中山
癸亥寶輔國將軍張驤護軍將軍徐超率將吏已下舉
城降寶聞帝幸信都乃趣博陵之深澤屯潯沱水遣弟
賀麟寇楊城殺常山守兵三百餘人寶悉出珍寶及宮
人招募郡縣羣盜無賴者多應之二月己巳帝進幸楊
城丁丑軍于鉅鹿之柏肆塢臨潯沱水其夜寶悉衆犯
營燎及行宮兵人駭散帝驚起不及衣冠跣出擊鼓俄
而左右及中軍將士稍稍來集帝設奇陳列烽營外縱

騎衝之寶衆大敗斬首萬餘級擒其將軍高長等四千
餘人戊寅寶走中山獲其器仗輜重數十萬計寶尚書
閔亮祕書監崔逞太常孫沂殿中侍御史孟輔等並降
降者相屬賜拜職爵各有差平原徐超聚衆反於畔城
詔將軍奚屠捕斬之并州守將封真率其種族與徒何
為逆將攻刺史元延延討平之是時柏肆之役遠近流
言賀蘭部帥附力眷紇突鄰部帥匿物尼紇奚部帥叱
奴根聚黨反於陰館南安公元順率軍討之不克死者

數千詔安遠將軍庾岳總萬騎還討叱奴根等滅之三
月己酉車駕次于盧奴寶遣使求和請送元觚割常山
以西奉國乞守中山以東帝許之已而寶背約辛亥車
駕次中山命諸將圍之是夜寶弟賀麟將妻子出走西
山寶見賀麟走恐先據和龍壬子夜遂將其妻子及兄
弟宗族數千騎北遁寶將李沈王次多張超賈歸等來
降遣將軍長孫肥追之至范陽不及受還城內共立慕容
普鄰為主夏四月帝以軍糧未繼乃詔征東大將軍

東平公元儀罷鄴圍徙屯鉅鹿積租楊城普鄰出步卒
六千餘人伺間犯諸屯兵詔將軍長孫肥等輕騎挑之
帝以虎隊五千橫截其後斬首五千生虜七百人宥而
遣之夏五月庚子大賞功臣帝以中山城內為普鄰所
脇而大軍迫之欲降無路乃密招喻之甲辰曜兵揚威
以示城內命諸軍罷圍南徙以待其變甲寅以東平公
元儀為驃騎大將軍都督中外諸軍事充豫雍荊徐揚
六州牧左丞相封衛王襄城公元題進封為王秋七月

普鄰遣烏九張驤率五千餘人出城求食寇常山之靈
壽殺害吏民賀麟自丁零中入于驤軍因其衆復入中
山殺普鄰而自立帝還幸魯口遣將軍長孫肥一千騎
襲中山入其郭而還八月丙寅朔帝自魯口進軍常山
之九門時大疫人馬牛多死帝問疫於諸將對曰在者
纔十四五是時中山猶拒守而饑疫並臻羣下感恩還
北帝知其意因謂之曰斯固天命將若之何四海之人
皆可與為國在吾所以撫之耳何恤乎無民羣臣乃不

敢復言遣撫軍大將軍畧陽公元遵襲中山艾其禾菜
入邪而還九月賀麟饑窮率三萬餘人出寇新市甲子
晦帝進軍討之太史令晁崇奏曰不吉帝曰其義云何
對曰昔紂以甲子亡兵家忌之帝曰紂以甲子亡周武
不以甲子勝乎崇無以對冬十月丙寅帝進軍新市賀
麟退阻泝水依漸洳澤以自固甲戌帝臨其營戰於義
臺塢大破之斬首九千餘級賀麟單馬走西山遂奔鄴
慕容德殺之甲申其所署公卿尚書將吏士卒降者二

萬餘人其將張驥李沈慕容文等先來降尋皆亡還是日復獲之皆赦而不問獲其所傳皇帝璽綬圖書府庫珍寶簿列數萬班賜功臣及將士各有差中山平乙酉襄城王題薨丁亥遣三萬騎赴衛王儀將以攻鄴是歲鮮卑禿髮烏孤私署大單于西平王

天興元年春正月慕容德走保滑臺儀克鄴收其倉庫詔賞將士各有差儀追德至於河不及而還庚子車駕自中山行幸常山之真定次趙郡之高邑遂幸于鄴民

有老不能自存者詔郡縣賑恤之帝至鄴巡登臺榭遍
覽宮城將有定都之意乃置行臺以龍驤將軍日南公
和跋為尚書與左丞賈彝率郎吏及兵五千人鎮鄴車
駕自鄴還中山所過存問百姓詔大軍所經州郡復貲
租一年除山東民租賦之半車駕將北還發卒萬人治
直道自望都鐵關鑿恒嶺至代五百餘里帝慮還後山
東有變乃置行臺於中山詔左丞相守尚書令衛王儀
鎮中山撫軍大將軍畧陽公元遵鎮渤海之合口右軍

將軍尹國先督租于冀州聞帝將還謀反欲襲信都安
南將軍長孫嵩執送斬之辛酉車駕發自中山至于望
都堯山徙山東六州民吏及徒何高麗雜夷三十六萬
百工伎巧十萬餘口以充京師車駕次于恒山之陽博
陵渤海章武羣盜並起畧陽公元遵等討平之廣川太
守賀盧殺冀州刺史王輔驅勒守兵抄掠陽平頓丘諸
郡遂南渡河奔慕容德二月車駕自中山幸繁峙宮更
選屯衛詔給內徙新民耕牛計口受田三月離石胡帥

呼延鐵西河胡帥張崇等聚黨數千人叛詔安遠將軍
庾岳討平之漁陽羣盜庫儻官輜聚衆反詔中堅將軍
伊謂討之徵左丞相衛王儀還京師詔畧陽公遵代鎮
中山夏四月壬戌進遵封常山王南安公元順進封毗
陵王征虜將軍歷陽公穆崇為太尉安南將軍鉅鹿公
長孫嵩為司徒帝祠天於西郊旗幟有加焉廣平太守
遼西公元意烈謀反於郡賜死原其妻子鄜城屠各董
羌杏城盧水郝奴河東蜀薛榆氏帥符興各率其種內

附六月丙子詔有司議定國號羣臣曰昔周秦以前世居所生之土有國有家及王天下即承為號自漢以來罷侯置守時無世繼其應運而起者皆不由尺土之資今國家萬世相承啓基雲代臣等以為若取長遠應以代為號詔曰昔朕遠祖總御幽都控制遐國雖踐王位未定九州逮于朕躬處百代之季天下分裂諸華之主民俗雖殊撫之在德故躬率六軍掃平中土凶逆蕩除遐邇率服宜仍先號以為魏焉布告天下咸知朕意秋

七月遷都平城始營宮室建宗廟立社稷漁陽羣盜庫
僞官韜復聚黨為寇詔冠軍將軍王建討平之八月詔
有司正封畿制郊甸端徑術標道里平五權較五量定
五度遣使循行郡國舉奏守宰不法者親覽察黜陟之
九月烏丸張驤子超收合亡命聚黨二千餘家據勃海
之南皮自號征東大將軍烏丸王抄掠諸郡詔將軍庾
岳討之冬十月起天文殿十有一月辛亥詔尚書吏部
郎中鄧淵典官制立爵品定律呂協音樂儀曹郎中董

謚撰郊廟社稷朝覲饗宴之儀三公郎中王德定律令
申科禁太史令晁崇造渾儀考天象吏部尚書崔元伯
總而裁之閏月左丞相驃騎大將軍衛王儀及諸王公
卿士詣闕上書曰臣等聞宸極居中則列宿齊其晷帝
王順天則羣后仰其度伏惟陛下德協二儀道隆三五
仁風被於四海盛化塞于大區澤及昆蟲恩霑行葦謳
歌所屬八表歸心軍威所及如風靡草萬姓顙顙咸思
係命而躬履謙虛退身後已宸儀未彰袞服未御非所

以上允皇天之意下副樂推之心宜光崇聖烈示軌憲
於萬世臣等謹昧死以聞帝三讓乃許之十有二月己
丑帝臨天文殿太尉司徒進璽綬百官咸稱萬歲大赦
改年追尊成帝已下及后號謚樂用皇始之舞詔百司
議定行次尚書崔元伯等奏從土德服色尚黃數用五
未祖辰臘犧牲用白五郊立氣宣贊時令敬授民時行
夏之正徙六州二十二郡守宰豪傑吏民二千家于代
都是歲蘭汗殺慕容寶而自立寶子盛殺汗僭立慕容

德自稱燕王

二年春正月甲子初祠上帝于南郊以始祖神元皇帝配降壇視燎成禮而反乙丑曲赦京師始制三駕之法庚午車駕北巡分命諸將大襲高車大將軍常山王遵等三軍從東道出長川鎮北將軍高涼王樂真等七軍從西道出牛川車駕親勒六軍從中道自駁髯水西北二月丁亥朔諸軍同會破高車雜種三十餘部獲七萬餘口馬三十餘萬匹牛羊百四十餘萬驃騎大將軍衛

王儀督三萬騎別從西北絕漠千餘里破其遺迸七部
獲二萬餘口馬五萬餘匹牛羊二十餘萬頭高車二十
餘萬乘并服玩諸物還次牛山及薄山並刻石記功班
賜從臣各有差庾戌征虜將軍庾岳破張超於勃海超
走平原為其黨所殺以所獲高車衆起廐苑於南臺陰
北距長城東包白登屬之西山廣輪數十里鑿渠引武
川水注之苑中疏為三溝分流宮城內外又穿鴻鴈池
三月己未車駕至自北伐甲子初令五經羣書各置博

士增國子太學生員三千人是月氏人李辯叛慕容德求援於鄴行臺尚書和跋跋輕騎往應之克滑臺收德宮人府藏又破德桂林王鎮及郎吏將士千餘人丙子遣建義將軍庾真越騎校尉奚斤討庫狄部帥葉亦干宥連部帥竇羽泥於太渾川破之庫狄歆支子胥亦干率其部落內附真等進破侯莫陳部獲馬牛羊十餘萬頭追殄遺迸入大峨谷中山太守仇儒亡匿趙郡推羣盜趙准為主號使持節征西大將軍冀青二州牧鉅鹿

公仇儒為淮長史聚黨扇惑詔中領軍長孫肥討平之
夏四月前清河太守傅世聚黨千餘家自號撫軍將軍
五月癸亥征虜將軍庾岳討破之秋七月起天華殿辛
酉大閱于鹿苑饗賜各有差陳郡河南流民萬餘口內
徙遣使者存勞之姚興遣衆圍洛陽司馬德宗將辛恭
靖請救八月遣太尉穆崇率騎六千往赴之增啓京師
十二門作西武庫除州郡民租賦之半辛亥詔禮官備
撰衆儀著于新令范陽人盧溥聚衆海濱稱使持節征

北大將軍幽州刺史攻掠郡縣殺幽州刺史封沓干慕
容盛遼西太守李朗舉郡內屬西河胡帥護諾于丁零
帥翟同蜀帥韓龍並相率內附冬十月太廟成遷神元
平文昭成獻明皇帝神主于太廟十有二月甲午慕容
盛征虜將軍燕郡太守高湖率戶三千內屬辛亥詔材
官將軍和突討盧溥天華殿成是歲呂光立其子紹為
天王自稱太上皇光死庶子纂殺紹僭立禿髮烏孤死
弟廆孤代立遣使朝貢

三年春正月戊午和突破盧溥於遼西生獲溥及其子
煥傳送京師轅之癸亥有事於北郊分命諸官循行州
郡觀民風俗察舉不法賜羣臣布帛各有差二月丁亥
詔有司祀日于東郊始耕籍田壬寅皇子聰薨三月戊
午立皇后慕容氏是月穿城南渠通於城內作東西魚
池夏四月姚興遣使朝貢五月戊辰詔謁者僕射張濟
使於姚興已巳車駕東巡遂幸涿廩遣使者以太牢祠
帝堯帝舜廟西幸馬邑觀澧源秋七月壬子車駕還宮

起中天殿及雲母堂金華室十有一月高車別帥勅力
捷率九百餘落內屬十有二月乙未詔曰世俗謂漢高
起於布衣而有天下此未達其故也夫劉承堯統曠世
繼德有蛇龍之徵致雲彩之應五緯上聚天人俱協明
革命之主大運所鍾不可以非望求也然狂狡之徒所
以顛蹶而不已者誠惑於逐鹿之說而迷於天命也故
有踵覆車之軌蹈覆逆之蹤毒甚者傾州郡害微者敗
邑里至乃身死名頽殃及九族從亂隨流死而不悔豈

不痛哉春秋之義大一統之美吳楚僭號久加誅絕君子賤其偽名比之塵垢自非繼聖載德天人合會帝王之業夫宣虛應厯觀古今不義而求非望者徒喪其保家之道而伏刀鋸之誅有國有家者誠能推廢興之有期審天命之不易察徵應之潛授杜競逐之雅言絕姦雄之僭肆思多福於止足則幾於神智矣如此則可以保榮祿於天年流餘慶於後世夫然故禍悖無緣而生兵甲何因而起凡厥來世勗哉戒之可不慎歟時太史

屢奏天文錯亂帝親覽經占多云改王易政故數革官號一欲防塞凶狡二欲消災應變已而慮羣下疑惑心謗腹非丙申復詔曰上古之治尚德下名有任而無爵易治而事序故邪謀息而不起姦慝絕而不作周姬之末下凌上替以號自定以位制祿卿世其官大夫遂事陽德不暢議發家倍故釁由此起兵由此作秦漢之弊捨德崇侈能否混雜賢愚相亂庶官失序任非其人於是忠義之道寢廉恥之節廢退讓之風絕毀譽之議興

莫不由乎貴尚名位而禍敗及之矣古置三公職大憂重故曰待罪宰相將委任責成非虛寵祿也而今世俗僉以台輔為榮貴企慕而求之夫此職司在人主之所任耳用之則重捨之則輕然則官無常名而任有定分是則所貴者至矣何取於鼎司之虛稱也夫桀紂之南面雖高而可薄姬旦之為下雖卑而可尊一官可以效智華門可以垂範苟以道德為實賢於覆餗部家矣故量已者令終而義全昧利者身陷而名滅利之與名毀

譽之疵競道之與德神識之家寶是故道義治之本名
爵治之末名不本於道不可以為宜爵無補於時不可
以為用用而不禁為病深矣能通其變不失其正者其
惟聖人乎來者誠思成敗之理察治亂之由鑒殷周之
失革秦漢之弊則幾於治矣是歲乞伏乾歸為姚興所
破李嵩私署涼州牧涼公

四年春正月高車別帥率其部三十餘落內附二月丁
亥命樂師入學習舞釋菜于先聖先師丁酉分命使者

循行州郡聽察辭訟糾劾不法三月帝親漁薦于寢廟
夏四月辛卯罷鄴行臺詔有司明揚隱逸五月起紫極
殿元武樓涼風觀石池廣苑臺秋七月詔鎮遠將軍充
州刺史長孫肥步騎二萬南徇許昌彭城詔賜天下鎮
戍將士布帛各有差冬十二月辛亥詔征西大將軍常
山王遵等率衆五萬討破多蘭部帥木易干材官將軍
和突率騎六千襲黠弗素古延等諸部集博士儒生比
衆經文字義類相從凡四萬餘字號曰衆文經是歲暮

容盛死寶弟熙僭立呂光弟子隆殺纂自立盧水胡沮
渠蒙遜私署涼州牧張掖公蒙遜及李嵩並遣使朝貢
五年春正月丁丑慕容熙遣將寇遼西虎威將軍宿沓
干等拒戰不利棄令支而還帝聞姚興將寇邊庚寅大
簡興徒詔并州諸軍積穀于平陽之乾壁戊子材官將
軍和突破黠弗素古延等諸部獲馬三千餘匹牛羊七
萬餘頭辛卯蠕蠕社論遣騎救素古延等和突逆擊破
之于山南河曲獲鎧馬二千餘匹班師賞賜將士各有

差二月癸丑征西大將軍常山王遵等至安定之高平
木易干率數千騎與衛辰屈丐棄國遁走追至隴西瓦
亭不及而還獲其輜重庫藏馬四萬餘匹駱駝犂牛三
千餘頭牛羊九萬餘口班賜將士各有差徙其民於京
師沙門張翹自號無上王與丁零鮮于次保聚黨常山
之行唐夏四月太守樓伏連討斬之五月姚興遣其弟
安北將軍義陽公平率衆四萬來侵平陽乾壁為平所
陷六月治兵于東郊部分衆軍詔鎮西大將軍毗陵王

順長孫肥等三將六萬騎為前鋒秋七月戊辰朔車駕西討八月乙巳至於柴壁平固守進軍圍之姚興悉舉其衆來救甲子帝渡蒙坑逆擊興軍大破之冬十月平赴水而死俘其餘衆三萬餘人語在興傳獲興征虜將軍尚書右僕射狄伯支越騎校尉唐小方積弩將軍姚梁國建忠將軍雷星康官北中郎將康猱平從弟伯禽已下四品將軍已上四十餘人獲先亡臣王次多斬勲並斬以狗興頻使請和帝不許羣臣勸進平蒲坂帝慮

蠕蠕為難戊申班師十有一月車駕次晉陽徵相州刺史庾岳為司空遣左將軍莫題討上黨羣盜秦頰丁零翟都於壺關丁丑上黨太守捕頰斬之都走林慮十有二月辛亥至自西征蠕蠕社崙犯塞詔常山王遵追之不及而還越勤莫弗率其部萬餘家內屬居五原之北是歲禿髮鹿孤病死弟儁檀統任遣使朝貢

六年春正月辛未朔方尉遲部別帥率萬餘家內屬入居雲中夏五月大簡興徒將畧江淮平荆揚之亂秋七

月鎮西大將軍司隸校尉毗陵王順有罪以王還第戊子車駕北巡築離宮于豺山縱士校獵東北踰霸嶺出參合代谷九月行幸南平城規度灋南面夏屋山背黃瓜堆將建新邑辛未車駕還宮冬十月起西昭陽殿乙卯立皇子嗣為齊王加車騎大將軍位相國紹為清河王加征南大將軍熙為陽平王曜為河南王封故秦愍王子夔為豫章王陳留王子右將軍悅為朱提王丁巳詔將軍伊謂率騎二萬北襲高車司馬德宗遣使朝貢

十有一月庚午伊謂大破高車是年島夷桓元廢其主
司馬德宗而自立僭稱大楚

天賜元年春正月遣離石護軍劉託率騎三千襲蒲子
三月丙寅擒姚興寧北將軍泰平太守衡譚獲三千餘
口初限縣戶不滿百罷之夏四月詔尚書郎中公孫表
使於江南以觀桓玄之釁也值玄敗而還蠕蠕社論從
弟悅伐大那等謀殺社論而立大那發覺來奔五月置
山東諸治發州郡徒謫造兵甲秋九月帝臨昭陽殿分

置衆職引朝臣文武親自簡擇量能敝用制爵四等曰
王公侯子除伯男之號追錄舊臣加以封爵各有差是
秋江南大亂流民繼負而奔淮北行道相尋冬十月辛
巳大赦改元築西宮十有一月上幸西宮大選朝臣令
各辨宗黨保舉才行諸部子孫失業賜爵者二千餘人
十有二月戊辰車駕幸材山宮是歲島夷劉裕起兵誅
桓元

二年春二月癸亥車駕還宮夏四月車駕有事于西郊

車旗盡黑是歲司馬德宗復僭立慕容德死兄子超僭立

三年春正月甲申車駕北巡幸材山宮校獵至屋孤山
二月乙亥幸代園山建五石亭三月庚子車駕還宮夏
四月庚申復幸材山宮占授著作郎王宜弟造兵法孤
虛立成圖三百六十時遂登定襄角史山又幸馬城甲
戌車駕還宮是月蠕蠕寇邊夜召兵將旦賊走乃罷六
月發八部五百里內男丁築灋南宮門闕高十餘丈引

溝穿池廣苑圓規立外城方二十里分置市里經塗洞
達三十日罷秋七月太尉穆崇薨八月甲辰行幸材山
宮遂至青牛山丙辰西登武要北原觀九十九泉造石
亭遂之石漠九月甲戌朔幸漠南鹽池壬午至漠中觀
天鹽池度漠北之吐鹽池癸巳南還長川丙申臨觀長
陂冬十月庚申車駕還宮

四年春二月封皇子脩為河間王處文為長樂王連為
廣平王黎為京兆王夏五月北巡自參合陂東過蟠羊

山大雨暴水流輜重數百乘殺百餘人遂東北踰石漠
至長川幸濡源常山王遵有罪賜死秋七月車駕自濡
源西幸參合陂築北宮垣三旬而罷乃還宮八月幸材
山宮是月誅司空庾岳冬十有一月車駕還宮是歲慕
容寶養子高雲殺熙自立赫連屈丐自稱大單于大夏
天王

五年春正月行幸材山宮遂如參合陂觀漁於延水至
甯川三月姚興遣使朝貢是歲皇孫燾生

六年夏帝不豫初帝服寒食散自太醫令陰羌死後藥數動發至此逾甚而災變屢見憂懣不安或數日不食或不寢達旦歸咎羣下喜怒乖常謂百寮左右人不可信慮如天文之占或有肘腋之虞追思既往成敗得失終日竟夜獨語不止若傍有鬼物對揚者朝臣至前追其舊惡皆見殺害其餘或以顏色變動或以喘息不調或以行步乖節或以言辭失措帝皆以為懷惡在心變見於外乃手自毆擊死者皆陳天安殿前於是朝野人

情各懷危懼有司懈怠莫相督攝百工偷竊盜賊公行
巷里之間人為希少帝亦聞之曰朕縱之使然待過災
年當更清治之爾秋七月慕容支屬百餘家謀欲外奔
發覺伏誅死者三百餘人八月衛王儀謀叛賜死冬十
月戊辰帝崩於天安殿時年三十九永興二年九月甲
寅上謚宣武皇帝葬於盛樂金陵廟號太祖泰常五年
改謚曰道武

史臣曰晉氏崩離戎羯乘釁僭偽紛紜豺狼競馳太祖

顯晦安危之中屈申潛躍之際驅率遺黎奮其靈武克
剪方難遂啓中原朝拱人神顯登皇極雖冠履不暇栖
遑外土而制作經謨咸存長世所謂大人利見百姓與
能抑不世之神武也而屯厄有期禍生非慮將人事不
足宜天實為之嗚呼

魏書卷二

魏書卷二考證

太祖紀帝左右于植等與諸部人謀為逆以應之事泄
○植北史作桓本書列傳同穆崇傳亦作于植

遣秦王觚使于慕容垂○綱目書于晉太元十六年是
為魏登國六年此書作五年

魏書卷二考證

欽定四庫全書

魏書卷三

齊

魏

收

撰

帝紀第三

太宗紀

太宗明元皇帝諱嗣太祖長子也母曰劉貴人登國七年生於雲中宮太祖晚有子聞而大悅乃大赦天下帝明叡寬毅非禮不動太祖甚奇之天興六年封齊王拜

相國加車騎大將軍初帝母劉貴人賜死太祖告帝曰
昔漢武帝將立其子而殺其母不令婦人後與國政使
外家為亂汝當繼統故吾遠同漢武為長久之計帝素
純孝哀泣不能自勝太祖怒之帝還宮哀不自止日夜
號泣太祖知而又召之帝欲入左右曰孝子事父小杖
則受大杖避之今陛下怒盛入或不測陷帝於不義不
如且出待怒解而進不晚也帝懼從之乃遊行逃於外
天賜六年冬十月清河王紹作逆太祖崩帝入誅紹士

申即皇帝位大赦改年為永興元年追尊皇妣為宣穆
皇后公卿大臣先罷歸第不與朝政者悉復登用之詔
南平公長孫嵩北新侯安同對理民訟簡賢任能彞倫
攸敘閏十月丁亥朱提王悅謀反賜死詔都兵將軍山
陽侯奚斤巡行諸州問民疾苦撫恤窮乏十有二月戊
戌封衛王儀子良為南陽王陰平公元烈進爵為王高
涼王樂真改封平陽王己亥帝始居西宮御天文殿蠕
蠕犯塞是歲乞伏乾歸據金城自稱秦王高雲為海夷

馮跋所滅跋僭號自稱大燕天王

二年春正月甲寅朔詔南平公長孫嵩等北伐蠕蠕平陽民黃苗等依汾自固受姚興官號并州刺史元六頭討平之二月癸未朔詔將軍于栗磾領步騎一萬鎮平陽夏五月長孫嵩等自大漠還蠕蠕追圍之於牛川壬申帝北伐蠕蠕聞而遁走車駕還幸參合陂秋七月丁巳立馬射臺於陂西仍講武教戰乙丑車駕至自北伐八月章武民劉牙聚衆反山陽侯奚斤討平之九月甲

寅葬太祖宣武皇帝於盛樂金陵冬十有二月辛巳詔將軍周觀率衆詣西河離石鎮撫山胡是歲司馬德宗將劉裕滅慕容超於廣固

三年春二月戊戌詔曰衣食足知榮辱夫人饑寒切已唯恐朝夕不濟所急者溫飽而已何暇及於仁義之事乎王教之多違蓋由於此也非夫耕婦織內外相成何以家給人足矣其簡官人非所當御及執作伎巧自餘悉出以配鰥民己亥詔北新侯安同等持節循行并定

二州及諸山居雜胡丁零問其疾苦察舉守宰不法其
寃窮失職彊弱相陵孤寒不能自存者各以事聞昌黎
遼東民二千餘家內屬三月己未詔侍臣常帶劔夏四
月戊寅河東蜀民黃思郭綜等率營部七百餘家內屬
五月丁卯車駕謁金陵於盛樂己巳昌黎王慕容伯兒
謀反伏誅六月姚興遣使來聘西河胡張賢等率營部
內附秋七月戊申賜衛士酺三日布帛各有差辛酉賜
附國大人錦罽衣服各有差八月戊寅詔將軍東州侯

尉古真統兵五千鎮西境太洛城冬十二月甲戌蠕蠕
斛律宗黨吐觚于等百餘人內屬甲午詔南平公長孫
嵩任城公嵇拔白馬侯崔元伯等坐朝堂錄決囚徒務
在平當

四年春二月癸未登虎園射虎賜南平公長孫嵩等布
帛各有差夏四月乙未宴羣臣於西宮使各獻直言秋
七月己巳朔東巡置四廂大將又放十二時置十二小
將以山陽侯奚斤元城侯元屈行左右丞相己卯大獬

于石會山戌子臨去畿陂觀漁庚寅至于濡源西巡幸
北部諸落賜以繒帛八月庚戌車駕還宮壬子幸西宮
臨板殿大饗羣臣將吏以田獵所獲賜之命民大酺三
日乙卯賜王公以下至宿衛將士布帛各有差冬十有
一月乙丑賜宗室近屬南陽王良已下至於總麻之親
布帛各有差十有二月丁巳車駕北巡至長城而還是
年乞伏乾歸為兄子公府所殺子熾磐立沮渠蒙遜自
稱河西王

五年春正月己巳大閱畿內男子十二以上悉集己卯
幸西宮頗拔大渠帥四十餘人詣闕奉貢賜以繒帛錦
罽各有差乙酉詔諸州六十戶出戎馬一匹庚寅大閱
於東郊部署將帥以山陽侯奚斤為前軍衆三萬陽平
王熙等十二將各一萬騎帝臨白登躬自校覽焉二月
戊申賜陽平王熙及諸王公侯將士布帛各有差庚戌
幸高柳川甲寅車駕還宮癸丑穿魚池於北苑庚午姚
興遣使來聘詔分遣使者巡求雋逸其豪門彊族為州

閭所推者及有文武才幹臨疑能決或有先賢世胄德行清美學優義博可為人師者各令詣京師當隨才敏用以贊庶政夏四月河東民薛相率部內屬乙巳上黨民勞聰士臻羣聚為盜殺太守令長相率外奔乙卯車駕西巡詔前軍奚斤等先行討越勒部於跋那山夏五月乙亥行幸雲中舊宮之大室丙子大赦天下西河張外建興王紹自以所犯罪重不敢解散庚戌遣元城侯元屈等率衆三千鎮并州乙卯詔會稽公劉潔永安侯

魏勤等率衆三千鎮西河六月西幸五原校獵于骨羅
山獲獸十萬獲澤劉逸自號征東將軍三巴王王紹為
署置官屬攻逼建興郡元屈等討平之秋七月己巳還
幸薄山帝登觀太祖遊幸刻石頌德之處乃於其旁起
石壇而薦饗焉賜從者大酺於山下奚斤等破越勒倍
泥部落於跋那山西獲馬五萬匹牛二十萬頭徙二萬
餘家於大甯計口受田河西胡曹龍張大頭等各領部
擁衆二萬人來入蒲子逼脇張外於研子壘外懼給以

牛酒殺馬盟誓推龍為大單于奉美女良馬於龍丙戌
車駕自大室西南巡諸部落賜其渠帥繒帛各有差遂
南次定襄大落城東踰七嶺山田於善無川八月癸卯
車駕還宮癸丑奚斤等班師甲寅帝臨白登觀降民數
軍實曹龍降執送張外斬之辛未賜征還將士牛馬奴
婢各有差置新民於大寧川給農器計口受田丁丑幸
材山宮癸未車駕還宮冬十月丁巳將軍元屈會稽公
劉潔永安侯魏勤等擊吐京叛胡失利潔被傷勤死之

十一月癸酉大饗于西宮姚興遣使朝貢來請進女帝許之

神瑞元年春正月辛酉以禎瑞頻集大赦改元辛巳幸繁時賜王公已下至於士卒百工布帛各有差二月戊戌車駕還宮是月赫連屈孑入寇河東蒲子殺掠吏民三城護軍張昌等要擊走之庚戌幸材山宮西河胡曹成吐京民劉初原攻殺屈孑所置吐京護軍及其守三百餘人乙卯起豐宮於平城東北夏五月辛酉車駕還

宮六月司馬德宗冠軍將軍太山太守劉研弟輔國將軍領東平太守陽平趙鸞廣威將軍平昌太守羅卓斗城屠各帥張文興等率流民七千餘家內屬河西胡酋劉遮劉退孤率部落等萬餘家渡河內屬戊申幸材山宮丁亥車駕還宮秋八月戊子詔馬邑侯元陋孫使於姚興辛丑遣謁者悅力延撫慰蠕蠕于什門招諭馮跋詔平南將軍相州刺史尉古真與司馬德宗太尉劉裕相聞使博士王諒假平南參軍將命焉姚興遣使來聘

冬十一月壬午詔使者巡行諸州校閱守宰資財非自家所齎悉簿為贓詔守宰不如法聽民詣闕告言之十二月丙戌朔蠕蠕犯塞丙申帝北伐蠕蠕河內人司馬順宰自號晉王太守討捕不獲是歲禿髮傁檀為乞伏熾磐所滅

二年春正月丙辰車駕至自北伐賜從征將士布帛各有差二月丁亥大饗于西宮賜附國大渠帥朝歲首者縑帛金罰各有差司馬德宗琅邪太守劉朗率二千餘

家內屬庚子河西胡劉雲等率數萬戶內附甲辰立太祖廟於白登之西三月詔曰刺史守宰率多逋慢前後怠惰數加督罰猶不悛改今年貲調懸違者謫出家財充之不聽徵發於民河西饑胡屯聚上黨推白亞栗斯為盟主號大將軍反於上黨自號單于稱建平元年以司馬順宰為之謀主夏四月詔將軍公孫表等五將討之河南流民二千餘家內屬衆廢粟斯而立劉虎號率善王司馬德宗遣使朝貢己卯車駕北巡五月丁亥次

於參合東幸大寧丁未田于四岬山六月戊午幸去畿
陂觀漁辛酉次于濡源築立螭臺射白熊於顏牛山獲
之丁卯幸赤城親見長老問民疾苦復租一年南次石
亭幸上谷問百年訪賢俊復田租之半壬申幸涿鹿登
橋山觀溫泉使使者以太牢祠黃帝廟至廣寧登厯山
祭舜廟秋七月還宮復所過田租之半九月闕有差河
南流民前後三千餘家內屬京師民饑聽出山東就食
冬十月壬子姚興使散騎常侍東武侯姚敞尚書姚泰

送其西平公主來帝以后禮納之辛酉行幸沮洳城癸亥車駕還宮丙寅詔曰古人有言百姓足則君有餘未有民富而國貧者也頃者以來頻遇霜旱年穀不登百姓饑寒不能自存者甚衆其出布帛倉穀以賑貧窮十一月丁亥幸材山宮庚子車駕還宮

泰常元年春正月甲申行幸材山宮戊子車駕還宮三月己丑長樂王處文薨常山民霍季自言名載圖讖持一黑石以為天賜玉印誑惑聚黨入山為盜州郡捕斬

之夏四月壬子大赦改元庚申河間王脩薨六月丁巳
車駕北巡秋七月甲申帝自白鹿陂西行大獮于牛川
登釜山臨殷繁水而南觀于九十九泉戊戌車駕還宮
九月戊午前并州刺史叔孫建等大破山胡劉虎渡河
東走至陳留為從人所殺司馬順宰等皆死司馬德宗
相劉裕沂河伐姚泓遣其部將王仲德為前鋒從陸道
至梁城兗州刺史尉建畏懦棄州北渡王仲德遂入滑
臺詔將軍叔孫建等渡河曜威滑臺斬尉建於城下冬

十月壬戌幸豺山宮徒何部落庫儗官斌先降後復叛
歸馮跋驍騎將軍延普渡濡水討擊大破之斬斌及馮
跋幽州刺史漁陽公庫儗官昌征北將軍關內侯庫儗
官提等首生擒庫儗官女生縛送京師幽州平十一月
甲戌車駕還宮築蓬臺於北苑十二月南陽王良薨是
歲姚興卒子泓立

二年春二月丙午詔曰九州之民隔遠京邑時有壅滯
守宰至不以聞今東作方興或有貧窮失農務者其遣

使者巡行天下省諸州觀民風俗問民疾苦察守宰治
行諸有不能自申皆因以聞辛酉司馬德宗滎陽守將
傅洪遣使詣叔孫建請以虎牢降求軍赴接德宗譙王
司馬文思遣使王良詣闕上書請軍討劉裕詔司徒長
孫嵩率諸軍邀擊劉裕戰於畔城更有負捷帝詔止諸
軍不克夏四月丁未榆山丁零翟蜀率營部遣使通劉
裕馮跋使人王特兒等通於司馬德宗章武太守捕特
兒等囚送京師丁巳幸高柳壬戌車駕還宮五月汝南

民胡譁等萬餘家相率內屬乙未司馬德宗齊郡太守
王懿來降車駕西巡至于雲中遂濟河田于大漠秋七
月作白臺於城南高二十丈司馬順之入常山流言惑
衆稱受天帝命年二十五應為人君遂聚黨於封龍山
趙郡大盜趙德執送京師斬之八月劉裕滅姚泓九月
癸酉司馬德宗平西將軍荊州刺史司馬休之息譙王
文思章武王子司馬國璠司馬道賜輔國將軍溫楷竟
陵內史魯軌荊州治中韓延之殷約平西參軍桓謐桓

遂及桓溫孫道子渤海刁雍陳郡袁式等數百人來降
姚泓匈奴鎮將姚成都與弟和都舉鎮來降冬十月己
酉詔司徒長孫嵩等還京師遣叔孫建鎮鄴癸丑豫章
王夔薨十有一月司徒長孫嵩等諸軍至樂平詔嵩遣
娥清周幾等與叔孫建討西山丁零翟蜀洛支等悉滅
餘黨而還復諸州租稅十有二月己酉詔河東河內有
姚泓子弟播越民間能有送致京師者賞之庚申田于
西山癸亥車駕還宮氏豪徐駿奴齊元子等擁部落三

萬於雍遣使內附詔將軍王洛生及河內太守楊聲等
西行以應之壬申幸大甯長川姚泓尚書東武侯姚敞
敞弟鎮遠將軍僧光右將軍姚定世自洛來奔是年李
嵩卒子歆立遣使朝貢

三年春正月丁酉朔帝自長川詔護高車中郎將薛繁
率高車丁零十二部大人衆北略至弱水降者二千餘
人獲牛馬二萬餘頭河東胡蜀五千餘家相率內屬三
月司馬德宗遣使來貢庚戌幸西宮以范陽去年水復

其租稅夏四月己巳徙冀定幽三州徙何於京師五月
丙午詔叔孫建鎮廣阿壬子車駕東巡至于濡源及甘
松遣征東將軍長孫道生給事黃門侍郎奚觀率精騎
二萬襲馮跋又命驍騎將軍延普自幽州北趨遼西為
聲勢帝自突門嶺待之道生至龍城徙其民萬餘家而
還六月乙酉車駕西返秋七月戊午至於京師八月鴈
門河內大雨水復其租稅九月甲寅詔諸州調民租戶
五十石積於定相冀三州冬十月戊辰築宮於西苑是

歲司馬德宗卒弟德文僭立赫連屈丐僭稱皇帝

四年正月壬辰朔車駕臨河大蒐于犢渚癸卯車駕還宮三月癸丑築宮於蓬臺北司馬德文寧朔將軍平陽太守匈奴護軍薛辯及司馬楚之司馬順明司馬道恭竝遣使請降夏四月庚辰車駕有事於東廟遠藩助祭者數百國辛巳南巡幸鴈門賜所過無出今年租賦五月庚寅朔觀漁于灤水己亥車駕還宮復所過一年租賦六月司馬德文建威將軍河西太守馮翊羌酋党道

子遣使內屬秋八月辛未東巡遣使祭恒岳甲申車駕
還宮所過復一年田租九月築宮於白登山冬十有二
月癸亥西巡至雲中踰白道北獵野馬於虜孤山至于
黃河從君子津西渡大狩於薛林山

五年春正月丙戌朔自薛林東還至于屋竇城饗勞將
士大酺二日班禽獸以賜之己亥車駕還宮三月丙戌
南陽王意文薨夏四月河西屠各帥黃大虎羌酋不蒙
娥等遣使內附丙寅起灋南宮五月乙酉詔曰宣武皇

帝體道得一天縱自然大行大名未盡美非所以光揚
洪烈垂之無窮也今因啓緯圖始覩尊號天人之意煥
然著明其改宣曰道更上尊謚曰道武皇帝以彰靈命
之先啓聖德之元同告祀郊廟宣于八表庚戌淮南侯
司馬國璠池陽侯司馬道賜等謀反伏誅六月丙寅行
幸翳犢山秋七月丁酉西至于五原丁未幸雲中大室
賜從者大酺八月癸亥車駕還宮閏月甲午陰平王烈
薨冬十有一月詔驍騎將軍延普城乾城十有二月丁

亥杏城羌酋狄溫子率三千餘家內附是歲劉裕廢殺其主司馬德文偕自稱皇帝號宋李歆為沮渠蒙遜所滅歆弟恂自立於敦煌

六年春正月辛未行幸公陽二月調民二十戶輸戎馬一匹大牛一頭三月甲子陽平王熙薨乙亥制六部民羊滿百口輸戎馬一匹發京師六千人築苑起自舊苑東包白登周回四十餘里夏六月乙酉北巡至蠕羊山秋七月西巡獵于祚山親射虎獲之遂至于河八月庚

子大獮于犢渚九月庚戌車駕還宮壬申劉裕遣使朝貢冬十月己亥行幸代十有二月丙申西巡狩至于雲中是歲沮渠蒙遜滅李恂

七年春正月甲辰朔自雲中西行幸屋竇城賜從者大酺三日蕃渠帥繒帛各有差二月丙戌車駕還宮賜從者布帛各有差大饗于西宮三月乙丑河南王曜薨夏四月甲戌封皇子燾為泰平王燾字佛釐拜相國加大將軍丕為樂平王加車騎大將軍彌為安定王加衛大

將軍範為樂安王加中軍大將軍健為永昌王加撫軍
大將軍崇為建寧王加輔國大將軍俊為新興王加鎮
軍大將軍獻懷長公主子嵇敬封長樂王拜大司馬大
將軍初帝素服寒食散頻年動發不堪萬機五月詔皇
太子臨朝聽政是月泰平王攝政劉裕卒子義符僭立
秋九月詔假司空奚斤節都督前鋒諸軍事為晉兵大
將軍行揚州刺史交阯侯周幾為宋兵將軍交州刺史
安固子公孫表為吳兵將軍廣州刺史前鋒伐劉義符

乙巳幸灋南宮遂如廣甯己酉詔泰平王率百官以法
駕田于東苑車乘服物皆以乘輿之副辛亥築平城外
郭周回三十二里辛酉幸橋山遣使者祠黃帝唐堯廟
因東幸幽州見耆年問其所苦賜爵號分遣使者循行
州郡觀察風俗冬十月甲戌車駕還宮復所過田租之
半奚斤伐滑臺不克帝怒議親南討為其聲援壬辰車
駕南巡出自天門關踰恒嶺四方蕃附大人各率所部
從者五萬餘人十有一月泰平王親統六軍出鎮塞上

安定王彌與北新公安同居守丙午曲赦司州殊死已
下劉義符東郡太守王景度棄滑臺走詔成臯侯元苟
兒為兗州刺史鎮滑臺十有二月遣壽光侯叔孫建等
率衆自平原東渡徇下青兗諸郡劉義符兗州刺史徐
琰聞渡河棄守走叔孫建遂東入青州司馬愛之秀之
先聚黨濟東皆率衆來降

八年正月丙辰行幸鄴存恤民俗司空奚斤既平兗豫
還圍虎牢劉義符守將毛德祖距守不下河東蜀薛定

薛輔率五千餘家內屬蠕蠕犯塞二月戊辰築長城於
長川之南起自赤城西至五原延袤二千餘里備置戍
衛三月乙巳帝田於鄴南韓陵山幸汲郡至于枋頭乙
卯濟自靈昌津幸陳留東郡乙丑濟河而北西之河內
造浮橋於冶坂津夏四月丁卯幸成臯城觀虎牢而城
內乏水懸綆汲河帝令連艦上施輶輜絕其汲路又穿
地道以奪其井遂至洛陽觀石經蠻王梅安率渠帥數
千人來貢方物閏月己未還幸河內北登太行幸高都

虎牢潰獲劉義符冠軍將軍司州刺史觀陽伯毛德祖
冠軍司馬滎陽太守翟廣建威將軍竇霸振武將軍姚
勇錯振威將軍吳寶之司州別駕姜元興治中竇溫士
衆大疫死者十二三辛酉帝還至晉陽班賜從官王公
已下逮於厮賤無不霑給五月丙寅還次鴈門皇太子
率留臺王公迎于句注之北庚寅車駕至自北巡六月
己亥太尉宜都公穆觀薨丙辰北巡至於參合陂遊于
蟠羊山秋七月幸三會屋侯泉詔皇太子率百官以從

八月幸馬邑觀于灑源九月乙亥車駕還宮詔司空奚斤還京師昌平侯娥清交趾侯周幾等鎮枋頭劉義符潁川太守李元德竊入許昌詔周幾擊之元德遁

闕三

字許昌還軍枋頭冬十月癸卯廣西宮起外垣牆周四
二十里十有一月己巳帝崩於西宮時年三十二遺詔
以司空奚斤所獲軍實賜大臣自司徒長孫嵩已下至
士卒各有差十有二月庚子上諡曰明元皇帝葬于雲
中金陵廟稱太宗帝禮愛儒生好覽史傳以劉向所撰

新序說苑於經典正義多有所闕乃撰新集三十篇採
諸經史該洽古義兼資文武焉

史臣曰太祖英雄北驅朔漠末年內多釁隙明元抱純
孝之心逢梟鏡之禍權以濟事危而獲安隆基固本內
和外輯以德見宗良無愧也



魏書卷三

魏書卷三考證

帝紀第三○魏收書此紀闕後人補以北史又取高氏
小史脩文殿御覽附益之

太宗紀司馬休之息譙王文思章武王子司馬國璠司
馬道賜輔國將軍溫楷竟陵內史魯軌荊州治中韓
延之殷約平西參軍桓謐桓璲及桓溫孫道子渤海

刁雍陳郡袁式等數百人來降○

臣人龍按晉書宗

室傳安帝反正追贈尚之衛將軍以休之長子文思

為嗣襲封譙郡王後文思怨望稱兵為裕所敗而死
不言降魏與此異

魏書卷三考證

欽定四庫全書

史部
魏書卷
四上至
六

詳校官編修臣溫汝道

洗馬臣王坦修覆勘

覆校官中書臣孫希旦

校對官中書臣袁文邵

謄錄監生臣彭邦經

謄錄監生臣劉國永

欽定四庫全書

魏書卷四上

齊

魏

收

撰

帝紀第四

世祖紀上

世祖太武皇帝諱肅太宗明元皇帝之長子也母曰杜貴嬪天賜五年生於東宮體貌瓌異太祖奇而悅之曰成吾業者必此子也泰常七年四月封泰平王五月為

監國太宗有疾命帝總攝百揆聰明大度意豁如也八年十月壬申即皇帝位大赦天下十有二月追尊皇妣為密皇太后進司徒長孫嵩爵為北平王司空奚斤為宜城王藍田公長孫翰為平陽王其餘普增爵位各有差於是除禁錮釋嫌怨開倉庫賑窮乏河南流民相率內屬者甚衆

始光元年春正月丙寅安定王彌薨夏四月甲辰東巡幸大寧秋七月車駕還宮八月蠕蠕率六萬騎入雲中

殺掠吏民攻陷盛樂宮楮陽子尉普文率輕騎討之虜
乃退走詔平陽王長孫翰等擊蠕蠕別帥破之殺數千
人獲馬萬餘匹語在蠕蠕傳九月大簡輿徒治兵於東
郊部分諸軍五萬騎將北討冬十有二月遣平陽王長
孫翰等討蠕蠕車駕次祚山蠕蠕北遁諸軍追之大獲
而還是年劉義符為其臣徐羨之等所廢殺立義符弟
義隆

二年春正月己卯車駕至自北伐以其雜畜班賜將士

各有差二月慕容渴悉隣反於北平攻破郡治太守與
守將擊敗之三月丙辰尊保母竇氏曰保太后丁巳以
北平王長孫嵩為太尉平陽王長孫翰為司徒宜城王
奚斤為司空庚申營故東宮為萬壽宮起永安安樂二
殿臨望觀九華堂初造新宇千餘詔曰昔在帝軒初制
造物乃命倉頡因鳥獸之跡以立文字自茲以降隨時
改作故篆隸草楷並行於世然經歷久遠傳習多失其
真故令文體錯謬會義不愜非所以示軌則於來世也

孔子曰名不正則事不成此之謂矣今制定文字世所用者頒下遠近永為楷式夏四月詔龍驤將軍步堆謁者僕射胡覲使於劉義隆五月詔天下十家發大牛一頭運粟塞上秋九月永安安樂二殿成丁卯大饗以落之冬十月治兵於西郊癸卯車駕北伐平陽王長孫翰等絕漠追之蠕蠕北走事具蠕蠕傳是年赫連屈丐死子昌偁立

三年春正月壬申車駕至自北伐班軍實以賜將士行

留各有差乞伏熾磐遣使朝貢請討赫連昌二月起大
學於城東祀孔子以顏淵配夏五月辛卯中山公元纂
進爵為王南安公元素復先爵常山王六月幸雲中舊
宮謁陵廟西至五原田於陰山東至和峴山秋七月築
馬射臺于長川帝親登臺觀走馬王公諸國君長馳射
中者賜金錦繒絮各有差八月車駕還宮劉義隆遣使
朝貢帝以屈丐既死諸子相攻九月遣司空奚斤率義
兵將軍封禮雍州刺史延普襲蒲坂宋兵將軍周幾率

洛州刺史于栗磾襲陝城冬十月丁巳車駕西伐幸雲
中臨君子津會天暴寒數日冰結十有一月戊寅帝率
輕騎二萬襲赫連昌壬午至其城下徙萬餘家而還語
在昌傳至祚山班所虜獲以賜將士各有差奚斤未至
蒲坂昌守將赫連乙升棄城西走昌弟助興守長安乙
升復與助興自長安西走安定奚斤遂入蒲坂十有二
月詔斤西據長安秦雍氏羌皆叛昌詣斤降武都氏王
楊元及沮渠蒙遜等皆遣使內附

四年春正月乙酉車駕至自西伐賜留臺文武生口繒
帛馬牛各有差從人在道多死其能到都者纔十六七
已亥行幸幽州赫連昌遣其弟平原公定率衆二萬向
長安帝聞之乃遣就陰山伐木大造攻具二月車駕還
宮三月丙子遣高涼王禮鎮長安詔執金吾桓貸造橋
於君子津丁丑廣平王連薨夏四月丁未詔員外散騎
常侍步堆謁者僕射胡覲等使於劉義隆是月治兵講
武分諸軍司徒長孫翰廷尉長孫道生宗正娥清三萬

騎為前驅常山王素太僕邱堆將軍元太毗步兵三萬
為後繼南陽王伏真執金吾桓貸將軍姚黃眉步兵三
萬部攻城器械將軍賀多羅精騎三千為前候五月車
駕西討赫連昌辛巳濟君子津三城胡酋鵠子相率內
附帝次拔隣山築城舍輜重以輕騎三萬先行戊戌至
于黑水帝親祈天告祖宗之靈而誓眾焉六月甲辰昌
引眾出城大破之事在昌傳昌將麾下數百騎西南走
奔上邽諸軍乘勝追至城北死者萬餘人臨陣殺昌弟

河南公滿及其兄子蒙遜會日暮昌尚書僕射問至拔城夜將昌母出走乙巳車駕入城虜昌羣弟及其諸母姊妹妻妾宮人萬數府庫珍寶車旗器物不可勝計擒昌尚書王買薛超等及司馬德宗將毛脩之秦雍人士數千人獲馬三十餘萬匹牛羊數千萬以昌宮人及生口金銀珍翫布帛班賚將士各有差昌弟平原公定拒司空奚斤於長安城娥清率騎五千討之西走上邽辛酉班師留常山王素執金吾桓貸鎮統萬秋七月己卯

築壇於祚嶺戲馬馳射賜射中者金錦繒絮各有差蠕
蠕寇雲中聞破赫連昌懼而還走八月壬子車駕至自
西伐飲至策勲告於宗廟班軍實以賜留臺百寮各有
差九月丁酉安定民舉城歸降冬十有一月以氐王楊
元為都督荆梁益寧四州諸軍事假征南大將軍梁州
刺史南秦王十有二月行幸中山守宰貪汚免者十數
人癸卯車駕還宮復所過田租之半

神麇元年春正月以天下守令多行非法精選忠良悉

代之辛未京兆王黎薨二月改元赫連昌退屯平涼司空奚斤進軍安定將軍邱堆為昌所敗監軍侍御史安頡出戰擒昌昌餘衆立昌弟定為王走還平涼三月癸酉詔侍中古弼迎赫連昌辛巳弼等以昌至于京師司空奚斤追定於平涼馬髦嶺為定所擒邱堆先守輜重在安定聞斤敗棄甲東走蒲坂帝聞大怒詔安頡斬堆夏四月赫連定遣使朝貢帝詔諭之壬子西巡戊午田于河西大赦天下南秦王楊元遣使朝貢六月丁酉并

州胡酋卜田謀反伏誅餘衆不安詔淮南公王倍斤鎮
慮虎撫慰之甲寅行幸長川秋七月車駕還宮八月東
幸廣甯臨觀溫泉以太牢祭黃帝堯舜廟螭螭大檀遣
子將萬餘騎入塞事具螭螭傳上郡休屠胡酋金崖率
部內屬九月車駕還宮上洛巴渠泉午觸等萬餘家內
附冬十月甲辰北巡王子田于牛川劉義隆淮北鎮將
王仲德遣步騎二千餘入寇濟陽陳留是月車駕還宮
閏月辛巳義隆又遣將王元謨兗州刺史竺靈秀步騎

二十人寇滎陽將襲虎牢豫州遣軍逆擊走之上郡屠
各隗詒歸率萬餘家內屬定州丁零鮮于臺陽翟喬等
二千餘家叛入西山劫掠郡縣州軍討之失利詔鎮南
將軍壽光侯叔孫建擊之十有一月行幸河西大校獵
十有二月甲申車駕還宮是歲皇子晃生乞伏熾磐死
子暮末僭立沮渠蒙遜遣使朝貢

二年春正月赫連定弟酒泉公傁自平涼來奔丁零鮮
于臺陽等歸罪詔赦之二月上黨李禹聚衆殺太守自

稱無上王署置將帥河內守將擊破之禹亡走入山為人執送斬之夏四月治兵于南郊劉義隆遣使朝貢庚寅車駕北伐以太尉北平王長孫嵩衛尉廣陵公樓伏連留守京師從東道與長孫翰等期會於賊庭五月丁未次于沙漠舍輜重輕騎兼馬至粟水蠕蠕震怖焚燒廬舍絕跡西走事具蠕蠕傳是月赫連定來侵統萬東至侯尼城而還秋七月車駕東轅至黑山校數軍實班賜王公將士各有差八月帝以東部高車屯已尼陂詔

左僕射安原率騎萬餘討之事具蠕蠕傳冬十月振旅
凱旋于京師告於宗廟列置新民於漠南東至濡源西
暨五原陰山竟三千里詔司徒平陽王長孫翰尚書令
劉潔左僕射安原侍中古弼鎮撫之十有一月西巡狩
田于河西至祚山而還

三年春正月庚子車駕還宮壬寅大赦天下癸卯行幸
廣寧臨溫泉作溫泉之歌二月丁卯司徒平陽王長孫
翰薨戊辰車駕還宮三月壬寅進會稽公赫連昌為秦

王夔邠雲中河西勅勒千餘家叛尚書令劉潔追滅之
帝聞劉義隆將寇邊乃詔冀定相三州造船三千艘簡
幽州以南戍兵集于河上以備之夏四月甲子行幸雲
中勅勒萬餘落叛走詔尚書封鐵追討滅之五月戊戌
詔曰夫士之為行在家必孝處朝必忠然後身榮於時
名揚後世矣近遣尚書封鐵剪除亡命其所部將士有
盡忠竭節以殞軀命者今皆追贈爵號或有蹈鋒履難
以自效者以功次進位或有故違軍法私離幢校者以

軍法行戮夫有功蒙賞有罪受誅國之常典不可暫廢
自今以後不善者可以自改其宣勅內外咸使聞知六
月詔平南大將軍假丹陽王太毗屯于河上以司馬楚
之為安南大將軍琅邪王屯潁川秋七月己亥詔曰昔
太祖撥亂制度草創太宗因循未遑改作軍國官屬至
乃闕然今諸征鎮將軍王公仗節邊遠者聽開府辟召
其次增置吏員庚子詔大鴻臚卿杜超假節都督冀定
相三州諸軍事行征南大將軍太宰進爵為王鎮鄴為

諸軍節度八月清河羣盜殺太守劉義隆將到彥之自
清水入河沂流西行帝以河南兵少詔攝四鎮乃治兵
將西討丙寅到彥之遣將渡河攻冶坂冠軍將軍安頡
督諸軍擊破之斬首五千餘級投水死者甚衆甲戌行
幸南宮獵于南山戊寅詔征西大將軍長孫道生屯于
河上九月己丑赫連定遣弟謂以代寇鄜城平西將軍
始平公隗歸等率諸軍討之擒賊將王卑殺萬餘人謂
以代遁走癸卯立密皇太后廟于鄴甲辰行幸統萬遂

征平涼冬十月庚申到彥之王仲德沿河置守還保東
平乙亥冠軍將軍安頡濟河攻洛陽丙子拔之擒義隆
將二十人斬首五千級時河北諸軍會于七女津彥之
恐軍南度遣將王蟠龍泝流欲盜官船征南大將軍杜
超等擊破斬之辛巳安頡平虎牢義隆司州刺史尹沖
隆城死十有一月乙酉車駕至平涼先是赫連定將數
萬人東禦於鄜城留其弟上谷公社于廣陽公度洛孤
城守帝至平涼登北原使赫連昌招諭之社于不降詔

安西將軍古弼等擊安定攻平涼定聞之棄廊城入于
安定自率步騎三萬從鶻觚原將救平涼與弼相遇弼
擊之殺數千人乃還走詔諸軍四面圍之甲午壽光侯
叔孫建汝陰公長孫道生濟河到彥之王仲德從清入
濟東走青州義隆兗州刺史竺靈秀棄須昌南奔湖陸
丁酉定乏水引衆下原詔武衛將軍丘眷擊之定衆大
潰死者萬餘人定中重創單騎遁走獲定弟丹陽公烏
視拔武陵公禿骨及公侯百餘人是日諸將乘勝進軍

遂取安定定從兄東平公乙升棄城奔長安劫掠數千家西奔上邽戊戌叔孫建大破竺靈秀於湖陸殺獲五千餘人已亥帝幸安定獲乞伏熾磐質子及定車旗簿其生口財畜班賜將士各有差庚子帝自安定還臨平涼遂掘塹圍守之行幸紐城安慰初附赦秦雍之民賜復七年定隴西守及將士數千人來降辛丑冠軍將軍安頡率諸軍攻滑臺琅邪王司馬楚之破劉義隆將於長社沮渠蒙遜遣使朝貢壬寅封壽光侯叔孫建為丹

陽王十有二月丁卯定弟社于度洛孤面縛出降平涼
平收其珍寶定長安臨晉武功守將皆奔走關中平壬
申車駕東還留巴東公延普等鎮安定是歲馮跋死弟
文通僭立

四年春正月壬午車駕次于木根山大饗羣臣賜布帛
各有差丙申劉義隆將檀道濟王仲德從清水救滑臺
丹陽王叔孫建汝陰公長孫道生拒之道濟等不敢進
是月乙伏暮末為赫連定所滅二月辛酉安頡司馬楚

之平滑臺擒義隆將朱脩之李元德及東郡太守申謨
癸酉車駕還宮飲至策勲告於宗廟賜留臺百官各有
差戰士賜復十年丁丑行幸南宮定州民饑詔啟倉以
賑之義隆將檀道濟王仲德東走諸將追之至厯城而
還三月庚戌冠軍將軍安頡獻義隆俘萬餘人甲兵三
萬夏五月庚寅行幸雲中六月赫連定北襲沮渠蒙遜
為吐谷渾慕瓚所執閏月乙未蠕蠕國遣使朝獻詔散
騎侍郎周紹使于劉義隆秋七月己酉行幸河西起承

華宮八月乙酉沮渠蒙遜遣子安周入侍吐谷渾慕瑣遣使奉表請送赫連定巳丑以慕瑣為大將軍西秦王九月癸丑車駕還宮庚申加太尉長孫嵩柱國大將軍特進左光祿大夫崔浩為司徒征西大將軍長孫道生為司空癸亥詔兼太常李順持節拜河西王沮渠蒙遜為假節加侍中都督涼州及西域羌戎諸軍事行征西大將軍太傅涼州牧涼王壬申詔曰頃逆命縱逸方夏未寧戎車屢駕不遑休息今二寇摧殄士馬無為方將

偃武脩文遵太平之化理廢職舉逸民拔起幽窮延登
雋又昧旦思求想遇師輔雖殷宗之夢板築罔以加也
訪諸有司咸稱范陽盧元博陵崔綽趙郡李靈河間邢
潁勃海高允廣平游雅太原張偉等皆賢雋之胄冠冕
州邦有羽儀之用詩不云乎鶴鳴九臯聲聞于天庶得
其人任之政事共臻邕熙之美易曰我有好爵吾與爾
縻之如元之比隱跡衡門不耀名譽者盡勅州郡以禮
發遣遂徵元等及州郡所遣至者數百人皆差次叙用

冬十月戊寅詔司徒崔浩改定律令行幸漠南十一月
丙辰北部勅勒莫弗庫若于率其部數萬騎驅鹿數百
萬詣行在所帝因而大狩以賜從者勒石漠南以記功
德宜城王奚斤坐事降爵為公十二月丁丑車駕還宮
延和元年春正月丙午尊保太后為皇太后立皇后赫
連氏立皇子晃為皇太子謁于太廟大赦改年己巳詔
曰朕以眇身獲奉宗廟思闡洪基廓清九服遭值季運
天下分崩是用屢征罔或寧息自始光至今九年之間

戎車十舉羣帥文武荷戈被甲櫛風沐雨蹈履鋒刃與
朕均勞賴神祇之助將士宣力用能摧折疆豎克翦大
慙兵不極武而二寇俱滅師不違律而遐方以寧加以
時氣和洽嘉瑞並降過於郡國不可勝紀豈朕一人獨
應此祐斯亦羣后協同之所致也公卿因茲稽諸天人
之會請建副貳夫慶賞之行所以褒崇勲舊旌顯賢能
以永無疆之休其王公將軍以下普增爵秩啟國承家
脩廢官舉雋逸蠲除煩苛更定科制務從輕約除故革

新以正一統羣司當深思效績直道正身立功立事無
或懈怠稱朕意焉二月丙子行幸南宮三月丁未追贈
夫人賀氏為皇后壬申西秦王吐谷渾慕瓚送赫連定
於京師夏五月大簡輿徒于南郊將討馮文通劉義隆
遣使朝貢六月庚寅車駕伐和龍詔尚書左僕射安原
等屯于漠南以備蠕蠕辛卯兼散騎常侍鄧穎使於劉
義隆秋七月己未車駕至濡水庚申遣安東將軍宜城
公奚斤發幽州民及密雲丁零萬餘人運攻具出南道

俱會和龍帝至遼西文通遣其侍御史崔聘奉獻牛酒
己巳車駕至和龍臨其城文通石城太守李崇建德太
守王融十餘郡來降發其民三萬人穿圍塹以守之是
月築東宮八月甲戌文通使數萬人出城挑戰昌黎公
元邱與河間公元齊擊破之死者萬餘人文通尚書高
紹率萬餘家保羌胡固己卯車駕討紹辛巳斬之詔平
東將軍賀多羅攻文通帶方太守慕容元於猴固撫軍
大將軍永昌王健攻建德驃騎大將軍樂平王丕攻冀

陽皆拔之虜獲生口班賜將士各有差九月乙卯車駕
西還徙營邱成周遼東樂浪帶方元菟六郡民三萬家
于幽州開倉以賑之冬十月癸酉車駕至濡水吐谷渾
慕瓚遣使朝貢十有一月乙巳車駕至自伐和龍十有
二月己丑馮文通長樂公崇及其母弟朗朗弟邈以遼
西內屬文通遣將封羽圍遼西先是辟召賢良而州郡
多逼遣之詔曰朕除偽平暴征討累年思得英賢緝熙
治道故詔州郡搜揚隱逸進舉賢俊古之君子養志衡

門德成業就才為世使或雍容雅步三命而後至或棲棲遑遑負鼎而自達雖徇尚不同濟時一也諸名人皆當以禮申諭任其進退何逼遣之有也此刺史守宰宣揚失旨豈復光益乃所以彰朕不德自今以後各令鄉閭推舉守宰但宣朕虛心求賢之意既至當待以不次之舉隨才文武任之政事其明宣勅咸使聞知是年禿髮儁檀子保周棄沮渠蒙遜來奔以保周為張掖公

二年春正月乙卯撫軍大將軍永昌王健督諸軍救遼

西丙寅以樂安王範為假節加侍中都督秦雍涇梁益
五州諸軍事衛大將軍儀同三司鎮長安二月庚午詔
兼鴻臚卿李繼持節假馮崇車騎大將軍遼西王承制
聽置尚書已下賜崇功臣爵秩各有差征西將軍金崖
與安定鎮將延普及涇州刺史狄子玉爭權構隙舉兵
攻普不克退保胡空谷驅掠平民據險自固詔散騎常
侍平西將軍安定鎮將陸俟討獲之壬午行幸河西詔
兼散騎常侍宋宣使於劉義隆丙申馮崇母弟朗來朝

三月司馬德宗驃騎將軍司馬元顯子天助來降壬子
車駕還宮夏五月己亥行幸山北六月遣撫軍大將軍
永昌王健尚書左僕射安原督諸軍討和龍將軍樓勃
別將五千騎圍瓦城文通守將封羽以城降收其民三
千餘家辛巳詔樂安王範發秦雍兵萬人築小城於長
安城內秋八月遼西王馮崇上表求說降其父帝不聽
九月劉義隆遣使朝貢奉馴象一戊午詔兼大鴻臚卿
崔躋持節拜征虜將軍楊難當為征南大將軍儀同三

司封南秦王冬十月南秦王楊難當率衆圍漢中十有
一月甲寅車駕自山北還宮十有二月己巳大赦天下
辛未幸陰山之北隴西休屠王宏祖率衆內屬金崖既
死部人立崖從弟當川領其衆詔兼散騎常侍盧元使
於劉義隆是歲沮渠蒙遜死以其子牧捷為車騎將軍
改封河西王

三年春正月乙未車駕次于女水大饗羣臣班賜各有
差戊戌馮文通遣其給事黃門侍郎伊臣乞和帝不許

丙辰金當川反楊難當克漢中送雍州流民七千家于
長安二月丁卯蠕蠕吳提奉其妹并遣其異母兄禿鹿
傀及左右數百人朝貢獻馬二千匹戊寅詔曰朕承統
之始羣凶縱逸四方未賓所在逆僭蠕蠕陸梁於漠北
鐵弗肆虐於三秦是以旰食忘寢抵掌扼腕期在掃清
逋殘寧濟萬寓故頻年屢征有事西北運輸之役百姓
勤勞廢失農業遭離水旱致使生民貧富不均未得家
給人足或有寒窮不能自贍者朕甚愍焉今四方順軌

兵革漸寧宜寬徭賦與民休息其令州郡縣隱括貧富
以為三級其富者租賦如常中者復二年下窮者復三
年刺史守宰當務盡平當不得阿容以罔政治明相宣
約咸使聞知辛卯車駕還宮三月甲寅行幸河西閏月
甲戌秦王赫連昌叛走丙子河西候將格殺之驗其謀
反羣弟皆伏誅己卯車駕還宮彭城公元栗進爵為王
辛巳馮文通遣尚書高顯上表稱藩詔徵其侍子戊子
金當川率其衆圍西川侯彭文暉於陰密夏四月乙未

詔征西大將軍常山王素討當川丁未行幸河西壬戌
獲當川斬之于長安以徇六月甲辰車駕還宮辛亥撫
軍大將軍永昌王健司空汝陰公長孫道生侍中古弼
督諸軍討和龍焚其禾稼徙民而還秋七月辛巳東宮
成備置屯衛三分西宮之一壬午行幸美稷遂至隰城
命諸軍討山胡白龍于西河九月戊子克之斬白龍及
其將帥屠其城冬十月癸巳蠕蠕國遣使朝貢甲午破
白龍餘黨于五原詔山胡為白龍所逼及歸降者聽為

平民諸與白龍同惡斬數千人虜其妻子班賜將士各有差十有一月車駕還宮十有二月甲辰行幸雲中

太延元年春正月壬午降死刑已下各一等癸未出太祖太宗宮人令得嫁甲申大赦改年二月庚子蠕蠕馬耆車師諸國各遣使朝獻詔長安及平涼民徙在京師其孤老不能自存者聽還鄉里丁未車駕還宮三月癸亥馮文通遣大將渴燭通朝獻辭以子疾夏五月庚申進宜都公穆壽為宜都王汝陰公長孫道生為上黨王

宣城公奚斤為恒農王廣陵公樓伏連為廣陵王本官
各如故遣使者二十輩使西域甲戌行幸雲中六月甲
午詔曰頃者寇逆消除方表漸晏思崇政化敷洪治道
是以屢詔有司班宣恩惠綏理百揆羣公卿士師尹牧
守或未盡導揚之美致令陰陽失序和氣不平去春小
旱東作不茂憂勤克已祈請靈祇上下咸秩豈朕精誠
有感何報應之速雲雨震灑流澤霑渥有鄙婦人持方
寸玉印詣潞縣侯孫家既而亡去莫知所在玉色鮮白

光照內映印有三字為龍鳥之形要妙奇巧不類人迹
文曰旱疫平推尋其理蓋神靈之報應也朕用嘉焉比
者已來禎瑞仍臻所在甘露流液降於殿內嘉瓜合蒂
生于中山野木連理殖於魏郡在先后載誕之鄉白鷺
集于盛樂舊都元鳥隨之蓋有千數嘉禾頻歲合秀於
恒農白雉白兔並見於渤海白雉三隻又集於平陽太
祖之廟天降嘉貺將何德以酬之所以內省驚震欣懼
交懷其令天下大酺五日禮報百神守宰祭界內名山

大川上答天意以求福祿丙午高麗鄯善國並遣使朝
獻戊申詔驃騎大將軍樂平王丕等五將率騎四萬東
伐文通秋七月田於柵陽己卯丕等至於和龍徙男女
六千口而還八月丙戌遂幸河西粟特國遣使朝獻九
月甲戌車駕還宮冬十月癸卯尚書左僕射安原謀反
伏誅甲辰行幸定州次于新城宮十有一月乙丑行幸
冀州己巳校獵于廣川丙子行幸鄴祀密太后廟諸所
過對問高年褒禮賢俊十有二月甲申詔曰操持六柄

王者所以統攝平政理訟公卿之所司存勸農平賦宰
民之所專急盡力三時黔首之所克濟各修其分謂之
有序今更不然何以為治越職侵局有紊綱紀上無定
令民知何從自今以後亡匿避難羈旅他鄉皆當歸還
舊居不問前罪民相殺害牧守依法平決不聽私輒報
者誅及宗族隣伍相助與同罪州郡縣不得妄遣吏卒
煩擾民庶若有發調縣宰集鄉邑三老計貲定課裒多
益寡九品混通不得縱富督貧避彊侵弱太守覆檢能

否覈其殿最列言屬州刺史明考優劣抑退姦吏升進
貞良歲盡舉課上臺牧守荷治民之任當宣揚恩化奉
順憲典與國同憂直道正身肅居官次不亦善乎癸卯
遣使者以太牢祀北岳

二年春正月甲寅車駕還宮二月戊子馮文通遣使朝
貢求送侍子帝不許壬辰遣使者十餘輩詣高麗東夷
諸國詔諭之三月丙辰劉義隆遣使朝貢辛未平東將
軍娥清安西將軍古弼率精騎一萬討馮文通平州刺

史元嬰又率遼西將軍會之文通迫急求救於高麗高麗使其大將葛蔓盧以步騎二萬人迎文通甲戌以闕

鎮虎牢夏四月甲申皇子小兒苗兒並薨五月乙卯馮文通奔高麗戊午詔散騎常侍封撥使高麗徵送文通丁卯行幸河西赫連定之西也楊難當竊據上邽秋七月庚戌詔驃騎大將軍樂平王丕等督河西高平諸軍討之詔散騎侍郎廣平子游雅等使於劉義隆八月丁亥遣使六輩使西域帝校獵于河西詔廣平公張黎發

定州七郡一萬二千人通沙泉道甲辰高車國遣使朝
獻九月庚戌驃騎大將軍樂平王丕等至略陽難當奉
詔攝上邽守高麗不送文通遣使奉表稱當與文通俱
奉王化帝以高麗違詔議將擊之納樂平王丕計而止
冬十有一月己酉行幸柁陽驅野馬於雲中置野馬苑
閏月壬子車駕還宮乙丑潁川王提改封武昌王河西
王沮渠牧犍遣使朝貢是歲吐谷渾慕瓚死

三年春正月癸未征東大將軍中山王纂薨戊子太尉

北平王長孫嵩薨乙巳鎮南大將軍丹陽王叔孫建薨
二月乙卯行幸幽州存恤孤老問民疾苦還幸上谷遂
至代所過復田租之半高麗契丹國並遣使朝獻三月
丁丑以南平王渾為鎮東大將軍儀同三司鎮和龍已
卯車駕還宮癸巳龜茲悅般焉耆車師粟特疏勒烏孫
渴槃陀鄯善諸國各遣使朝獻丁酉劉義隆遣使朝貢
夏五月己丑詔曰方今寇逆消殄天下漸晏比年以來
屢詔有司班宣惠政與民寧息而內外羣官及牧守令

長不能憂勤所司糾察非法廢公帶私更相隱置濁貨
為官政存苟且夫法之不用自上犯之其令天下吏民
得舉告守令不如法者丙申行幸雲中秋七月戊子使
撫軍大將軍永昌王健司空上黨王長孫道生討山胡
白龍餘黨於西河滅之八月甲辰行幸河西九月甲申
車駕還宮丁酉遣使者拜西秦王慕瓚弟慕利延為鎮
西大將軍儀同三司改封西平王冬十月癸卯行幸雲
中十有一月壬申車駕還宮甲申破洛那者舌國各遣

使朝獻奉汗血馬是歲河西王沮渠牧犍世子封壇來朝

四年春三月庚辰鄯善王弟素延耆來朝癸未罷沙門年五十已下江陽王根薨是月高麗殺馮文通夏五月戊寅大赦天下丙申行幸五原秋七月壬午車駕北伐事具蠕蠕傳冬十月乙丑大饗六軍十二月丁巳車駕至自北伐上洛巴泉輩等相率內附詔兼散騎常侍高雅使劉義隆

五年春正月庚寅行幸定州三月丁卯詔衛大將軍樂安王範遣雍州刺史葛那取上洛劉義隆上洛太守鐔長生棄郡走辛未車駕還宮庚寅以故南秦王世子楊保宗為征南大將軍秦州牧武都王鎮上邽夏四月丁酉鄯善龜茲疏勒焉耆諸國遣使朝獻五月丁丑治兵於西郊癸未遮逸國獻汗血馬六月甲辰車駕西討沮渠牧犍侍中宜都王穆壽輔皇太子決留臺事大將軍長樂王嵇敬輔國大將軍建寧王崇二萬人屯漠南以

備蠕蠕秋七月己巳車駕至上都屬國城大饗羣臣講
武馬射壬午留輜重分部諸軍撫軍大將軍永昌王健
尚書令鉅鹿公劉潔諸軍與常山王素二道並進為前
鋒驃騎大將軍樂平王丕太宰陽平王杜超督平涼廊
城諸軍為後繼八月甲午永昌王健獲牧犍牛馬畜產
二十餘萬牧犍遣弟董來率萬餘人拒戰於城南望塵
退走丙申車駕至姑臧牧犍兄子祖踰城來降乃分軍
圍之九月丙戌牧犍兄子萬年率麾下來降是日牧犍

與左右文武五千人面縛軍門帝解其縛待以藩臣之禮收其城內戶口二十餘萬倉庫珍寶不可稱計進張掖公禿髮保周爵為王與龍驤將軍穆羆安遠將軍源賀分略諸郡雜人降者亦數十萬牧犍弟張掖太守宜得燒倉庫西奔酒泉樂都太守安周南奔吐谷渾遣鎮南將軍奚眷討張掖遂至酒泉牧犍弟酒泉太守無諱及宜得復奔晉昌使弋陽公元潔守酒泉鎮北將軍封沓討樂都掠數千家而還班賜將士各有差戊子蠕蠕

犯塞遂至七介山京師大駭皇太子命上黨王長孫道
生等拒之事具蠕蠕傳冬十月辛酉車駕東還徙涼州
民三萬餘家于京師留驃騎大將軍樂平王丕征西將
軍賀多羅鎮涼州癸亥遣張掖王禿髮保周諭諸部鮮
卑保周因率諸部叛於張掖十有一月乙巳劉義隆遣
使朝獻并獻馴象一是月高麗及粟特渴盤陀破洛那
悉居半諸國各遣使朝獻十有二月壬午車駕至自西
伐飲至策勲告於宗廟楊難當寇上邽鎮將元勿頭擊

走之是歲鄯善龜茲疏勒焉耆高麗粟特渴盤陀破洛
那悉居半等國並遣使朝貢

魏書卷四上

魏書卷四上考證

世祖紀初造新字千餘○

臣人龍

按本書太祖紀天興

四年比衆經文字凡四萬餘字此則初造新字頒之
遠近蓋天興所集者經傳所有也始光所造者時俗
所行而衆經文所不及收者也金石文字記謂說文
所無而後人續添之字大都出此然三國志云有山
陰朱育依體像類造作異字千名以上則知別撰之
字自漢有之矣

馮文通長樂公崇及其母弟朗朗弟邈○北史作馮文
通子長樂公崇考列傳崇朗邈皆文通子也加一子
字義較明

魏書卷四上考證